

Koliko smo transparentni?

29.05.2015.-Sarajevo: **Centar za promociju civilnog društva (CPCD)** organizovao je okrugli sto na temu: **Finansijske transparentnosti organizacija civilnog društva (OCD) u BiH**, na kojem su prisustvovali predstavnici OCD, državne i lokalne uprave i akademske zajednice.

Prof. dr. **Meliha Bašić** sa Ekonomskog fakulteta Univerziteta u Sarajevu, istakla je da transparentnost OCD ne karakterišu samo izvještaji prema donatoru, nego i javnost o izvorima finansiranja, sistemu internih kontrola, predstavljanju konkretnih efekata djelovanja, te dodala da je transparentnost samo dio ukupne odgovornosti pa i ugleda organizacija. Svoje izlaganje zaključila je riječima da su mnoge organizacije zaboravile svoju misiju u trci za preživljavanjem.

Goran Kučera, ispred Ministarstva pravde BiH, istakao je da se za OCD na godišnjem nivou iz budžetskih sredstava izdvaja preko 100,000,00 KM što su značajna sredstva, te nagalasio potrebu unificiranja procedura alokacije, ali i odgovornosti onih OCD čije su aktivnosti finansirane javnim novcem. Postavio je pitanje da li vlasti finansiraju prioritete u skladu sa zvaničnim javnim politikama.

Navodeći razloge za pokretanje kampanje za transparentan sistem javnog finansiranja NVO, **Aida Daguda**, direktorica CPCD, iznijela je da je finansijska i programska transparentnost svih strana u procesu bitna. Nevladine organizacije trebaju raditi sa nivoom otvorenosti i transparentnosti koji se očekuje od demokratskih vlasti, što podrazumijeva stavljanje na uvid javnosti izvještaj o radu, rezultatima, izvorima finansiranja i finansijskim podacima.

Daguda je predstavila planove CPCD za uspostavljanje online registra koji će ponuditi udruženjima i fondacijama besplatan prostor za predstavljanje svojih godišnjih izvještaja o radu, i koji će služiti i kao olakšavajući alat u procesu dodjele grantova za sve zainteresovane domaće i strane donatore. Osim podataka o radu udruženja, CPCD će pozvati i donatore da budu transparentniji u procesu dodjele svojih sredstava. Registar će biti operativan do kraja ove godine, a ideju su već podržali razni nivoi vlasti u BiH.

Učesnici Okruglog stola su se istakli da tamo gdje su procedure fluidne, gdje nadzor i odgovornost izostaju, ostavljaju prostor za svaku vrstu korupcije, te je s jedne strane neophodno povećati transparentnost alokacije javnog novca vladinog sektora, i odgovornost organizacija kojima se dodjeluju sredstva poreskih obveznika u vidu predstavljanja rezultata svog rada i finansijske potrošnje.

***CPCD** će nastaviti sa svojim naporima da se procedure alokacije sredstava kao i rad OCD učine što vidljivijim svim zainteresiranim stranama.*

Okrugli stol je dio Program zagovaranja za izgradnju podsticajnog okruženja za razvoj civilnog društva u Bosni i Hercegovini, koji je pokrenuo CPCD u okviru projekta: Održivost civilnog društva, finansiranom od strane Američka agencija za međunarodni razvoj (USAID).

Glavni cilj Programa zagovaranja je promocija i podrška izgradnji povoljnijeg pravnog, institucionalnog i poreskog okvira za razvoj CD u BiH na državnom i entitetskom nivou vlasti, te u Distriktu Brčko.

U okviru Programa zagovaranja realizovaće se ukupno četiri posebne, međusobno povezane kampanje zagovaranja:

- Zagovaranje za uspostavu funkcionalnih mehanizama saradnje Vlade i OCD u BiH
- Kampanja zagovaranja za transparentan sistem javnog finansiranja OCD u BiH

- Kampanja zagovaranja za podsticajni poreski okvir za jačanje individualne i korporativne filantropije
- Promocija i uvođenje Etičkog kodeksa i dobrog upravljanja u OCD u BiH

Glavni nosilac aktivnosti u okviru Programa zagovaranja je neformalna, međusektorska koalicija „Civilni dijalog“, koju čine zainteresovane strane iz sva tri sektora bh. društva – civilnog društva, vladinog i poslovnog sektora.